

PHUITONG

(Estd. March 24, 2002)

An organ of the Zomi Baptist Church, Shillong

Vol. 2, No. 11.

“Kisin Kum”

January 24, 2010

Nipini

Phuitong pak kikta

Pasian huhna tawh Kumthak 2010 mel mu thei ihih manin Pasian tungah i lungdam hi. Tua tawh kitonin i Phuitong zong paknuama a ngum sawtvei ta a, tu in hong pakkhia ziziai kik thei ahih manin lungdam hang.

Khangnote'n March 24, 2002 ni-a a thukimna leh hanciamna tawh a kipan hih PHUITONG thukizakna pen April 7, 2002 niin a suak masa pen Biakinn ah khua pawlpi President in hawmkhia a, “*Vasa te in Phuitong pakzu dawnin a gilvah mah bangin a sim mi khempeuh in gilvahna in nei henla, vasa te'n a pak a bawp zuazua bangin mite in zong hih Phuitong bawm ciat uh hen,*” ciin thupha pia hi.

Editor Tg. Hau Za Cin makaihna tawh a kipat pan Vol.1, No. 21, October 13, 2002 ciang dong pelem loin kizom suak hi. October 2, 2002 in pawlpi Paper Anniversary kizanga, tua phawkna in PHUITONG MAGAZINE Vol.1 kibawl in, Phuitong thukizakna pen tawlinga phot hi. March 14, 2004 ciangin Editor thak Tg. S. Go Za Mung in kizom kik a, type writer kizang nawnlo in Computer tawh kikhen sitset ta hi. July 4, 2004 ciangin Vol.1, No.30 tawh Vol.1 khak uh a, July 18, 2004 niin Vol. 2, No.1 tawh kipan kik in, November 21, 2004 niin Vol. 2, No.10 tawh khawl leuleu hi.

Tua manin tuni a i Phuitong pen Vol. 2, No. 11 ahi hi!

Tua banga hun kikkhek tuamtuum kawmkal pan tuni a sim theih dinga hong pak kik manin Pasian min phat hang. Phuitong Editor a sem a tamzaw sangnaupang ahih manin hih bangin a pelemtoto kha hi a, mailamah a pelem nawnlohna dingin ngaihsutna om theileh

hoih mahmah ding hi. Gentehna in Khawk Sia (Area Pastor) bangin Editor sem leh pelem nawnlo thei ding hi. Thungetna ah phawk ni.

Pasian in Israel te kumpi David kiangah hih bangin ‘kamciam’ a pia hi:

- ulian hi dingin na tuu cinna pan kong sam a;
- na min ka liansak a, na galte kong zo sak hi;
- amau inn ciat ah a ten theihna ding leh a kinawngkaisak nawnlohna dingin na mite ading ‘mun’ khat seh in amaute ka ‘phut’ ding hi;
- nang a lian in kong bawl ding a;
- na suan leh khak sung pan na tapa khat khangsak in kumpi ka suaksak dinga, ama gam ka kipsak ding hi;
- amah in ka biakinn lam ding a;
- ama’ pa ka hi dinga, amah ka ta’ ahi ding hi;

ci hi. Tua thu azak ciangin Kumpi David sungtum in, “*TOPA Pasian aw, nangmah in hih ciangdong kei nong tunpihna dingin kei kua hi a, ka innkuanpihte bang ahi hiam?*” aci hi (1 Khang 17:1-27).

Pasian kamciam a ngah David a lungdam mah bangin ei zong, tuni in, Pasian ompihna leh thupha hangin lungdam ni. //

ZBC Shillong Kum 10 Cingta Ding

October 2, 2010 ciangin i pawlpi kum 10 cingta ding ahih manin nupite nam puan silh kim thei dingin kisan mahmah uh hi. Lapi ding la phuak theite'n phuak theih hi. Magazine zong bawlsawm uh a, article zong at in puak theih hi.

Tu Kum Thubulphuh

KISINNA

“*Pumpi kisinna manpha a, Kha thu-a kisinna manphazaw lai hi.*” 1 Tim 4:8

Editor : Dr. Hau Za Cin
Jt. Editor: Rev. Gin Lam Thang, Area Pastor

Address: Zomi Baptist Church,
Block A/1, Lumjingsuk, Madanriting,
Shillong 793021, Meghalaya, INDIA

Vol. 2, No. 11.

PHUITONG

January 24, 2010 Nipini

Laimai 2

Phuitong suaksate sung pan

- BYF Project 2002 dingin KEYBOARD kiguang.
- Phuitong a kipat laiin Rev. JM Paupu, Gen. Secy, CBCNEI leh ZBC Headquarter panin Rev. GK Nang, ES in lungdampihna Editor Tg. Hau Za Cin tungah khak uh hi.
- July 14, 2002 niin Shillong BYF Khangnote khutma JESUH TANGTHU (TEDIM KAM) mipi kiangah kihawmkhia thei hi.
- July 28, 2002 niin BYF in Freshers Welcome –cum-Fecilitation Programme (Maithak Muakna leh Laizo Pahtawina) masa pen EFCI Hall ah zang uh hi.
- Pawlpi innvehna masa pen Aug 11-13, 2002 sung Rev. GK Nang, ES in nei, upate leh nupi pawlkhatin uap thei uh hi.

Kua In Bang Gen

“Tuhun pen kihawhhawh hun hinawn kei, sep neilo a vakvak hun zong hinawn kei, thunuam gena holimlim hun zong hinawn kei, NASEP HUN hi.”

– Rev. Job Thawngno

“Mi’n ihihna hilo hong gen uh leh heh ding hikei, ihihna hilo hiven; ihihna hong gen uh leh zong heh ding hikei, ihihna hiven.”

– Rev. Dr. J.M. Ngul Khan Pau

“Shillong a om sangkah khangnote pen Lai khangtosak nuam, Thu leh La kan, Pawlpi leh Minam kingakna ahah manin tha ka ngah mahmah hi.”

– Rev. GK Nang, ES, ZBC Office

“Satan in a lauh penpen lungsim takpi tawh thungetna himawh hi.”

– Upa Vum Khan Do

Pune ah M.Th. sin ding

Tg. Lian Muan Kham, B.D. in Union Biblical Seminary (UBS), Pune ah M.Th. (NT/Greek) admission ngah, lungdampih hang.

Thu Tuamtuam

1. January 1, 2010 in Pa Gin Za Pau a sepna Indian Army pan Subedar tawh hong khawlta hi. Tu in a ngaihno Nu Go Ngaih Niang leh a tate 3 tawh ARC ah om uh hi. Cidama pension ciang dong hoihtaka sem thei Bu Gin Za Pau i lungdampih a, Topa in thupha hong piaksak zel hen.
2. Kawlgam pan hong zin Rev. Hen Khan Go te innkuan tawh Upa Gin Khang Mang leh Upa Thawng Za Thang te innkuan Jan 18, 2010 niin Delhi ah zin uhhi. Amau a sungpa uh Tg. Thang Do Nang mualbawlina hun Jan. 23, 2010 ciangin zang ding uh hi. A hun zatna ding uh leh cidama hong tunkikna ding uh thungetna ah phawk ni.
3. Tg. Pau Min Thang zong Sairang khua Mizogam ah Sangsia sem dingin Jan. 10 niin hong zinsan. Cidama a sep theihna ding thungetna ah phawk ni.
4. Innkuan te veh dingin Nu Lunno leh Angaih Lamka zuanin Jan 23 niin zinkhia. Bon Voyage!

Lungdampihna

Kumsima leitungbup Zomi laiat siam kitelna ah tukum Rev. G.K.Nang in pahtawina, “**ZONET Writer of the Year 2009**,” hong ngah ahah manin lungdampihna thu i pulak hi. A tam sem laiat thei dingin Topa in thupha hong piaksak hen. Kumlui in Dr. Hau Za Cin in ngah hi. Amah zong i lungdampih hi.

Hong tung diamdiam uh

Inn lamah Christmas leh Kumthak zanga ciahte cidamin hong tungkikta uh: Lia Do Ngaih, Muante, Zote, Sian Huai, Zen Dim, Luani leh Tg. Lawma, Suan Ngaih Cin, Asawm, Suan, Nang Gin, Kapa, Khaipi, Khup Za Khai, Siam; leh Nu Niang Suan, Nu Nuam, Pa Mang. **Welcome Back!**

!Exam dingte laisim nuam!